

ASA ANY SEYCHELLES

Olona mihoatra ny 100 no voasolokin'ireo mpisoloky

Ho an'ireo liana hiasa atsy amin'ny Nosy Seychelles, olona miisa 100 mahery no voasolokin'ireo mpisoloky roalahy teto an-drenivohitra. Nanaparitaka peta-drindrina tamina faritra maro teto an-drenivohitra izy roalahy milaza fa misy asa any Seychelles ary mikarama 400 euros isam-bolana ny olona iray, no sady iantohana ny trano sy ny sakafo. Nasiona laharana finday ihany koa ho an'izay liana sy hanao ilay asa.



Ireo mpisoloky roalahy milaza fa mahavita mandefa olona hiasa any Seychelles.

Rehefa mihaona mivantana amin'izy ireo ny olona hofitahany dia mampiseho taratasy sandoka fifanarahana amin'ilay orinasa any ivelany sy tatarasy fifanarahana

arak'asa ireto mpisoloky ireto. Ho an'ireo olona nahita izany ka roboka dia nasain'izy ireo nandoa vola 600 000 Ar sandan'ny fikarakarana tara-

tasy sy hanaovana "hébergement" any Seychelles. Azon'izy ireo ny vola dia harirariny eny ny olona ary mody omeny laharana pasipaoro san-

doka hoentina milaza fa efa vita ilay pasipaoro ary efa lasa any Seychelles, fa miandry fiantsoana amin'ny fiaingana sisa. Fitaka avokoa anefa izany rehetra izany, nosavaina ny tranon'izy roalahy dia nahitana fitomboky ny Minisiteran'ny fahasalam-bahoaka sy antontan-taratasy maro samihafa izay marihina fa samy sandoka avokoa. Niaiky ny heloka nataony ihany koa izy ireo ary nanambara, fa hoentiny ampiasainy amin'ny fisolokiana avokoa ireo antontan-taratasy sy fitomboka sandoka ireo rehefa voasambotry ny mpitandro filaminana izy ireo.

Niaina

Fambolen-kazon'ny foibe FJKM

Any Andanona no anjaran'ny eto Antananarivo

Ny sabotsy 18 desambra 2021 ho avy izao, no fotoamben'ny foibe Fjkm, amin'ny fambolena-kazo amin'ity taona ity, any Andanona distrikan'i Manjakandriana faritra Analamanga. Sady ezaka ho tontolo maitso, no fanambin'ny foibe Fjkm efa an-taonany maro izy io. Samy manana ny fandaminana ny faritra hafa toy ny any Fihonana Ankazobe sns... Nanamafy ny filohan'ny Fjkm, ny mpitandrina Irako Andriamahazosoa Ammi, fa ho tohizana isan-taona ity fambolena-kazo ity ary entanina hatrany ny mpino kristianina samihafa, mba samy hanatanteraka ity hetsika fambolena-kazo ity. Miara-miasa amin'ny MFE ihany koa ny foibe Fjkm ary karazan-kazo maro no ho volena amin'io sabotsy io. Asa kosa anefa na ho avy ny orana amin'io andro io, na mbola ho maina ihany.

Rajo




Anisan'ireo zanakazo hambolena ny FJKM ny sabotsy izao.

CEG Ambahikily Morombe

Mipetraka amin'ny tany ny mpianatra, satria tsy misy dabilio

Mampalahelo ireo mpianatra sasany ao amin'ny CEG Ambahikily, any amin'ny distrikan'i Morombe faritra Atsimo Andrefana amin'izao fotoana, mianatra mipetraka amin'ny tany ireo mpianatra satria tsy misy dabilio ny sekoly. Noho izay antony izay, mihosom-bovoka ireo mpianatra. Kao-minina iray ao anatin'ny distrikan'i Morombe i Ambahikily. Toerana ambanivohitra nefa ahitana sekoly misy mpianatra mavitrika ary mpampianatra manana traikefa. Na izany aza, toy ny miasa irery izy ireo amin'ny fanabeazana ny ankizy, satria dia sahala amin'ny tany lavitra Andriana, ka tsy misy mijery akory ny fahasahiranana mianjady. Na eo



Mpianatra mianatra amin'ny tany any Ambahikily Morombe.

amin'ny lafiny foto-drafitr'asa izany na eo amin'ny lafiny fampitaovana dia mbola misedra fahasahiranana tanteraka. Ataon'ny ministera mpiahy ho faralahy sy anjorom-bala ny fanabeazana any an-

toerana. Taona maro izay, mbola mipetraka amin'ny tany ireo mpianatra amin'ny sekoly CEG any antoerana. Manginy fotsiny ny fahalotoana ateraky ny fihosonam-bovoka. Ho an'ny sekoly CEG ihany io

voalaza io, fa mbola tsy voaresaka ny an'ny amin'ny sekoly EPP. Ankoatra izany, mbola tsy vita hatramin'izao ny tafon'ny sekoly Lisea, izay lasan'ny rivo-mahery tamin'ny taon-dasa. Mianatra amin'ny sekoly tsy misy tafo ihany koa ireo mpianatra, miharitra ny hafanana be. Iaraha-mahalala anefa fa ambony dia ambony ny tahan'ny mari-pana eto amintsika ary tsy ho ela dia hiditra amin'ny vanimpotoana ny orana isika, hanao ahoana ny fiatrehan'ireo mpianatra izany amin'ny vanimpotoanan'ny orana koa? Manao antso avo amin'ny ministera mpiahy izy ireo, mba hijery akaiky izao toe-draharaha izao.

Stefa

Pasitera Tantely Ratsimba

Nizara ny "Fitoriana marina"

Samy mahatsapa sy mahatsikaritra ny isambatan'olona ankehitriny, fa mirona amin'ny "filazantsaran'ny tany" sy ny fananan-karena ny ankamaroan'ireo "Mpino", ka manadino ny fototry ny filazantsara marina dia ny fibebahana sy ny tahotra an'Andriamanitra. Ny fahatsapana izany no nanosika sy nanainga ny Pasitera Tantely Ratsimba, nanatanteraka fotoana hahafahana mifampizara ny fitoriana marina, mifototra amin'ny voalazan'ny baiboly, izay, notanterahana, ny alahady teo, nanomboka, tamin'ny 09 ora maraina, nitohy tamin'ny 02 ora tolakandro, tetsy amin'ny efitrano malalaky ny PK 00 Soarano. "Katsaho ny zavatra any ambony, any amin'izay itoeran'i Kristy, saino ny zavatra any ambony fa tsy ny ety an-tany". Io no lohahevitra novelabelarin'i Pasitera Tantely Ratsimba teny an-toerana tamin'ny alalan'ny fampianarana sy ny fitoriana ny filazantsara. Tsy nisy ny fitatazana rakitra, sy ny fanentanana ara-bola nandritra ny fanatanterahana ny fotoana rehetra. Notolorana kapila mangirana "DVD" maimaimpoana mirakitra fampianarana kosa, ireo tonga nanatrika. Raha tsiahivina, ny taona 2010 no nomen'i Jesosy Kristy an'i Pasitera Tantely Ratsimba ny iraka "Miomana" hihaona amin'Andriamanitrao miompàna ho amin'ny famerenana amin'ny laoniny ny fitoriana izay mifototra tanteraka amin'ny baiboly. Ho fanatanterahana izany no antom-pisian'ity hetsika goavana, natao, ny alahady teo, tetsy amin'ny efitrano malalaky ny PK 00 Soarano ity. Tanteraka ara-bakiteny tokoa, araka izany, ilay hoe: "Dia ho fantatrareo ny marina, ary ny marina no hahafaka anareo tsy ho andevo".

Lalaso R.

Mpanakanto Djino nisy namono

10 taona an-tranomaizina ny sazin'ilay olona nikapa antsy azy

Volana vitsivitsy lasa izay no nisy nikapa, na namira tamin'ny antsy ny mpanakanto Djino, mpanakanto anisan'ny manana ny maha-izy azy amin'izao fotoana any amin'ny tapany avaratry ny Nosy iny, nandritra ny alim-pan-

dihizana izay nafanainy, izy sy ny tarika miaraka aminy. Nivoaka ankehitriny ny didim-pitsarana momba izany raharaha izany, sazy mihàtra 10 taona an-tranomaizina no azon'i Jaoroby, ilay tovolahy namira antsy an'i

Djino, mpanakanto malagasy izay nisy namira meso tamin'ny 06 oktobra 2021 iny, nandritra ny bal izay nataony tao Bemaneviky Andoharano distrikan'Ambanja faritra Diana. Io no didy navoakan'ny fitsarana tao Am-

banja ny herinandro teo. Ankoatra izany, efa salama tanteraka kosa i Djino ankehitriny ary efa manohy ny fitetezam-paritra ataony.

Niaina

Kiranomena faritra Bongolava

Faritra tsy milamina, mpitondra moto iray maty nisy namono



Ilay lehilahy nitondra moto, maty nisy namono.

Faritra tsy milamina ny any Kiranomena any amin'ny faritra Bongolava iny. Toerana ahitana fanafihan-jiolahy mitam-piadiana ihany koa. Lehilahy iray tokony ho 50 taona nandeha moto, no hita faty novonoin'olona omaly alatsinainy 13 desambra 2021. Raha izy an-dàlana hamonjy fodiana any Kiranomena iny, teo amin'ny toerana atao hoe Amparihimanga, 3 km tsy hidirana an'i Kiranomena, no no-taperin'ireo tsy mataho-tody ny ain'ity

raim-pianakaviana ity. Ilay moto nentiny dia mbola hita teo akaikiny. Arak'izany, mety mifangaro amin'izao raharaha izao ny disadisam-piarahamonina, sy ny asan'ny jiolahy mpanono olona. Efa tonga nijery sy nizaha ny razana teny an-toerana ireo tompon'andraikitra isan-tsokajiny ary nanao ny fanadihadiana, ahafantarana ny marina momba izao vonoan'olona izao.

Stefa



Ny Pasitera Tantely Ratsimba, nizara ny "Fitoriana marina".